

皇清文穎續編

皇清文穎續編卷二十二

頌

聖駕再巡江浙頌

謹序

梁詩正

歲在旃蒙大淵獻準夷効順西戎卽敘

皇帝軫念東南黎庶仰瞻雲日將復修巡方之典江
臯浙汜偶書無年上關

聖慮煦妪覆育民困立蘇凱澤旁流和氣四塞明年
歲果大收困膚鱗積耕夫堯豎謳吟歡忭喁喁

望

幸環封疆大吏而籲請傾厯濫陌莫可禦遏

皇上惄然重趄其意諏辰戒塗展采錯事恭奉

慈寧臨幸江浙補助應時溫清無闕登岱而白雲起

於封中觀河而榮光浮於水上一茅三脊致自

江淮萬國玉帛會於會稽減營衛却供億捐租

賜爵洗瘢滌垢凡諸陳詩納賈之制行慶施惠

之文罔不兼舉

聖祖仁皇帝所先後施行者遵循無忒視昔有加猗
歟皇哉斯固三古以還生民所未有之盛軌也
載筆之臣宜有龐鴻博龐之辭參伍經誥卓然
揚

聖德於千載以上而制繁體大或才詘而不能達其
辭或識闇而不能提其要逡巡辭讓噤不敢吐
臣
身依

日月最親且久管蠡之見竊嘗規

高深於萬分之一援證往昔比量時勢矢卷阿之音

儷於雅頌臣之職也臣聞王者敬天立極大

統以建中撫萬方而求莫非徒高端拱之名崇

清淨之化而已閭閻有幽隱非時邁無以周知

風俗有淳澆非省方無以設教肇自軒皇爰周

邳隆昭垂至今百王莫易然而地有廣狹德有

厚薄平成甫奏則一歲可以四巡要荒未賓則

十二年乃一巡狩漢禮濤嶽事近神仙唐告嵩

高志期封禪創顯雖崇規模未廣紀鴻烈者莫
得而云也我

皇上體聖神文武之姿致豫大豐亨之治咸五登三
孕虞育夏釀化周浹澤及無外東自日出西暨
日入含生負性之倫衣皮飲血之族延頸

至人睢盱眊眊梯山航海而至願奉正朔襲冠帶者
鞮屨不能通其樂象胥不能譯其語充溢藁街
罔不臣僕蠢爾準夷介居戎服野性難馴鴉音

未革

聖祖仁皇帝六師三駕而不忍滅其種

世宗憲皇帝兩路出兵而未嘗掃其穴洪業未竟用
貽我

皇上無疆之福

天錫智勇丕承

前光運九天九地之神謀收千載一時之偉績藉其
蕃落隸我版圖師不踰時兵不再舉刊陰山以

樹碑波伊犁而飲馬漢唐保塞張皇用師力蹙
而中止今且折鞭箠而驅之此豈侈摧伐誇富
強哉

聖王馭夷畧不世出叛則討服則舍安邊柔遠而異
域歸忠德盛化神而四裔慕義威行萬里功高
百王操之有原本致之有積漸也世儒拘牽文
義墨守往籍或持勞師襲遠之戒心或執羈縻
勿絕之迂說機宜坐失虧損王度甚無取焉且

夫王者六合以爲家天地以爲量中與外無異
土也修與攘非兩事也西北之守禦或疎則東
南之財產必蹙三江兩浙之地縱橫計之袤廣
幾踰萬里時和歲豐物衆地大未嘗出一甲輸
一粟以佐

聖天子出師之用飽食安卧熙熙皞皞忘帝力於何
有不知

九重宵旰日取茅檐蔀屋之家室潛移密運厝之於

衽席之安而躋之以春臺之樂匪一朝夕故矣
豈待今日之

清問而後見

聖主惠養黎元之至意哉懿夫一遊一豫以爲民也
因天事地善則歸親而王者不尸其功欽惟

皇太后昭明富媼母育羣生以天下養而孝道昭爲
天下先而孝治大

皇上體

聖母慈覆天下之心其於億兆臣民百姓若嬰兒赤
子常在懷抱前年河決徐邳擧菱淮浦而民慶
安瀾舊年南土蝻生漕粟湖湘而民無捐瘠

湛恩汪濊旁魄遐暢民雖蚩蚩報塞奚自南山之頌
君子也曰萬壽無期七月之躋公堂也曰萬壽
無疆呼嵩祝歲聲滿天地下民所以貢芹曝之
忱答

高厚之澤者以此若

臣生逢

盛世質本庸愚鼎餽徒慚烏哺之私獲遂江湖雖遠
魏闕之心長懸前荷風雲侍從扈蹕南來今蒙

日月照臨迎

鑾北上數

臣

遭際揣

臣

本分誠宜率先江浙士庶如

古土訓誦訓之官夾王車詔觀事以播

皇風而揚

聖教固不得以辭義弁陋爲解也謹拜手稽首而獻

頌曰

伊邃古初以君牧民六龍蜿蜒一歲四巡後王德薄
畫圻自封法宮深居而忘歲功

聖人首出八荒在闕勤恤幽隱志通欲達德洽無外
教訖遠裔曰尊曰親孚乎血氣混一車書分明尉候
方嶽畢朝肆覲羣后玉關以西有戎不賓歸罪司敗
隸爲藩臣

皇輿式廓包絡九有

帝念民依將南巡狩祇謁

闕里在泮獻囚登封告成迓承

天庥南土阻飢

帝爲盱食方舟漕粟立起溝濬驂駢撤解以待歲豐
天心嘉應協氣四充民曰噫嘻

帝實活我我倉我庾庭碩繁夥跂踵延望

翠華復來環顧上請

帝曰俞哉五載一巡古惟帝世六年一狩亦采玉制
惟五與六經傳所紀與時變通美符前軌恭奉

聖慈

鑾輅再駕省方設教孝先天下赤烏見曰黃龍夾輶
萬靈警蹕三辰綴旒周覽土俗載攷吏績豈曰遊豫
關民休戚禁旅旦萬留屯河北供億屏却慮耗民力
吁嗟河伯其魚我民寧茲湛玉大惠兆人高堰旣築
洪澤不灌洪惟

皇祖卓有成算我

皇繼序相度原隰一再

指授河壩寧輯秋風瓠子陋彼漢歌萬里鏡澈桃花
不波於

皇時邁昊天其子基命勅幾治臻上理扇以祥風澍
以甘雨所過賜復

問民疾苦錄瑕復玷肆赦胥災觀文考藝興賢育才
遂長幼孤緩養老壽繄我浙民被

德尤厚維海有壺維江有沱比量江海

帝澤孔多

天章巍煌山水增秀豈惟山水寵及花柳王民皞皞
抃舞載道重瞻

日角影動翠葆猶憶辛年人樂姬煦願

皇歲臨福我浙浙

臣受

殊恩逾越秩班錫類

賜養敢謂遂閒循陔日短戀

關心長思惟報

國獨有文章敷陳六合描繪日月有志未逮彌憂才

竭儲精覃思敬效揚厲作

皇一經示億萬世

聖駕再巡江浙頌

謹序

邵齊燾

臣

聞懷柔式序周家崇時邁之勲遊豫親侯夏
諺製吾休之頌莫不以考同遐邇輯玉帛而大
皇靈窮覽有無降和鸞而求民瘼斯固王政之
大經盛世之恒軌矣

國家道尊域大德配乾元奔走八荒率海外而有
截甄陶六幕勞天下以無私

皇上丕冒流仁重熙繼照納黃圖於塞晏濟赤子於

恬愉上咸五而下登三澤南洽而威北暢川珍
嶽貢慶叶昌辰晷洽風揚俗臻化國惟東南之
都會有吳越之故封控淮海以分疆蔭斗牛而
畫野舟車輻輳爲財賦之所生巖壑星羅亦名
勝之所聚赫山京口宋帝之所嘗遊柳色濤聲
唐臣之所曾詠崇基峻址銅溝玉檻之遺曲水
流觴修竹清湍之舊屬以百年

教澤沐浴而涵濡

列聖恩膏沈潛而匝洽人文由其蔚起生齒於是殷
繁故以圖政任人倍勞

睿慮披圖辨物尤繁

天情憶當辛未之仲春曾覩

巡遊之盛典至今溪魚谷鳥思鈞廣之重聞岸草巖
花想旌旆之再拂望

幸之情爲日久矣乃者旃蒙紀歲淵獻名年屬準夷
有款關之臣

王師成掃穴之舉百年梗化之俗納版籍於司民
累代逋誅之酋縻長纓於

北闕命偏師而禽頡利未比其神用賊將以取淮
西詎方其速旣已受俘

宗廟勒石環林有

詔來春告功

闕里於是江淮父老吳會衣纓莫不跂踵瞻雲翹
心就日僉以泗沂東會波接陽侯蒙嶧南闕雲

連芒碭望珠旗而在目道里非遙引桂楫以遵
塗津梁不隔請因

幸魯遂事

觀河大吏以聞

詔書報可旋值商羊告異江東則淫潦三時河伯不

仁淮北則洪濤千頃

皇上厯念推溝閔懷懸磬蠲除補助

德意頻蕃賑卹扶持

恩波稠疊流冗得所不藉監門之繪圖倉廩時開
非關汲黯之持節斗升釜庾計口無遺巴蜀荆
襄汎舟相繼遂使牂羊息詠鴻鴈忘劬起之捐
瘠之中登之衽席之上是則舉天下被

澤之厚無若東南之一隅極斯民愛戴之情難
酬

天地之再造惟願擁

龍舟於道左共效嵩呼迎

羽蓋於亭臯羣臚華祝然而

皇上方穆然深思皇然遠慮以爲黎民當阻饑之後
未忍勞以耘除官吏有期會之煩或恐妨於賑
給爰宣

渙汗暫輟觀風旣而暘雨順時年成玉燭麥禾登隴
稼委黃雲功敘可歌民天有賴然後順輿情
而

制蹕諏吉日以浮鑾猶恐池臺宮館或以珍麗而啟

侈心糗糒芻糧或以儲峙而煩民力黜浮去華
之訓諄復於

鹽書省事約費之懷丁寧於

詔旨至矣夫可謂比於先王觀動爲天下法者乎粵
以二十有二年太歲在於丁丑太族中於孟春

皇上迺奉

皇太后紆

玉輅動

金根火正清氛雨師灑道川回嶽運驤八驥於

皇衢風舉雲搖稅六虬於江左藻舟初御周覽河
隄雲罕徐經遍觀桑稼競湖開棹渡楊子而逕
胥臺笠澤移帆下錢唐而探禹穴火耕水耨土
俗依然柳葉梅花風光不改攬湖山之勝槩玩
溪壑之春姿涉目留連皆成舊識隨時

吟賞別啟新篇迺有鳩杖扶輪銅車繞陌縟川藻
野士女歡娛而近

光溢郭填城黔黎踴躍而睹

聖暢

慈輿之矚覽道極於承歡採下里之風謠事光於展

義洋洋乎皞皞乎信可以邁甫草於周年陋縱

陽於漢日者也

微臣

海國凡鱗雲衢退翼十年

珥筆舊立螭頭

雙闕鳴珂曾瞻雉尾家承雨露弟兄並忝於科名
身在江湖姓氏猶蒙於

記憶蓋銘鈞曲成之理在用舍而皆

恩况葵藿傾向之誠豈進退而有間常念一違省闈
五閱冬春星漢無舟楫之因蓬萊有風飈之阻
何幸屏居隴畔忽睹

天容伏處巖隈還聞

清蹕遇風縱壑莫喻鳬藻之情騰實蜚聲未忘蟲篆
之習庶幾與漁樵之侶共述

皇風偕耕鑿之儔同稱

帝力比史公之留滯遭逢竊幸於周南歌

天子之南巡辭翰遠慚於平子拜手稽首敢獻頌曰
維昔帝鴻登九陟熊亦越伊耆遊陶作宮夏后休助
周王會同義隆衷對典重觀風一章

我

皇闡釋政惟稽古稽古巡方紹

聖祖緒東遵濬汴北踐并土維岱維崧旣秩旣旅二
章

會稽具區其州曰揚東南奧壤財賦之疆

皇之初巡歲在重光

皇興旣旋民懷勿忘

三章

蠢彼準夷久患於邊有攜而歸惟十九年冬納其降
春修我鋌攻昧侮亡

廟畧遐宣

四章

我師旣獲旣獻其俘

詔祀

孔林以彰

聖謨卜明之春以動

皇輿吳民聞之引領以須

五章

惟此吳民謂

帝其邇濟淮通波交徐接軌

六龍其來除道以俟

帝曰俞哉民悅以喜

六章

歲則不登吳越並饑旣賑旣蠲補助以時萬億其費

以活窮黎軫其饑劬

詔緩巡期

七章

惟明年秋禾稼旣實岳牧俟

駕間闕候

蹕風雨清塗義和筮日正月癸卯允習其吉

八章

疆圉之陬

巡駕載興肅奉

慈寧

安車以行容裔

辰旒黼綬

翠旌

升隄觀河祈福於垠

九章

問老觀侯德禮孔殷山川光華草木交欣載吟載飲

祝

皇萬春以歲以年長奉

皇巡十章

平定回部頌

謹序

觀保

皇上御極之二十有四年十月西域渠孽蕩掃蕃部

執馘獻俘來朝

京師班師奏凱甚盛事也洪惟我

國家受

天景命統一區宇

列聖重光凝庥篤祐我

皇上纘無疆之

丕緒際累洽之昌辰百度咸修九功時敘仁風翔於六合愷澤暨乎九垓乃猶

宵旰弗康所其無逸雖古帝王保泰持盈之深意何以加茲是以星羅環矢雲集共球懸繩度索之區漆齒雕題之國皆獻琛奉贄重譯來王夫龍堆葱嶺天地所以界區域絕外內也書曰西戎卽敘禹旣就而序之非上威服致其貢物也況我

國家版圖日廓亘古未有財力有餘士馬彊盛雖
蒟醬邛竹通犀翠羽之珍蒲梢龍文魚目汗血
之馬充於黃門盈於外府要亦方物是常耳盛
德在我無取乎彼也乃者伊犁小腆恃遠跳梁
厯有年所

兩朝屢申克詰羽翼雖摧蘖芽未靖洎乎厥部內亂
衆心瓦解諸酋款關請命者接踵日至

皇上審隨時之義運獨斷之謨

命將興師兩路並進所過咸簞食壺漿歡迎道左蓋
師出不數旬無輓粟飛芻之費無頓兵折矢之
勞而渠魁已就縛矣

皇上方將案其輿地考其族屬衆建屏藩以輯寧我
邊陲詎知天厭克德不延厥類潛竄之游魂不
久而函首苟存之殘喘隨時而就殲自是威行
萬里訖于龍荒絕漠之區左右之哈薩克東西
之布魯特以及諸戎渠長靡不懍懍震聳底貢

歸誠望風而恐後

盛朝寬大順撫而有之包涵徧覆三代以來靡得
而尙已乃泰山何難壓卵而螳臂輒敢當車螯
茲霍集占兄弟倖釋纍囚實昧銜環之義重歸
舊穴轉殷反噬之謀抗我師顏仍其負固於是
殫

一人之焦勞體

天心之助順元戎振旅六師用命旣款服準夷餘黨

因利乘便以定回部風之所被罔不披靡迨至
葉爾奇木城下而二酋固已魂驚魄奪矣于斯
時也二酋收合餘燼可數萬人而我師以孤軍
單進黑水之役一以當千爭於呼吸所謂良平
失其智賁育失其勇者也惟是

宸衷獨斷固已先事預防因之

日鑒在茲罔弗乘時取濟是以迢遙萬餘里矢盡援
絕人困馬疲而赴敵銜枚不期而會雷轟電掣

鹿駭麋驚何其神也夫樂生惡死物理常然而
去順效逆人情所戒雖西域諸部脣齒相依然
養惡保奸不如剔除苞蘖之爲安也疆圉蹂躪
不如安堵無恐之爲樂也畏疆鄰之實逼而苟
且自全不如父母孔邇之爲計深而慮遠也况
戡亂除暴旣以信義服之於前撻伐張威復以
神武懾之于後迄乎伏莽已窮奔林無所非特
救一方之水火實已拯萬姓于顛危宜乎殊俗

異黨供臂指以衛前驅被毳荷旃効腹心而爭
敵愾茲值初陽之吉櫜矢戢戈適當獻歲之期
策勛飲至奉

慈寧而稱上壽善則歸

親隆

郊廟以告成功事惟紹述勒銘於東膠西序巋然奎

壁騰輝渙汗於金檢玉書允矣寰瀛禔福

微臣

職司樞貳無能少効前籌欣際昌期何以對揚

休命竊抒鏤管用紀殊勲謹拜手稽首而作頌

其詞曰

縣縣景運篤生

聖皇積德累業撫有萬方

列聖繼統至治馨香聲教四訖旬要綏荒陸贛水慄
以梯以航百年禮樂聿際光昌我

皇繩武繼序不忘仁育義正綱舉目張蕞爾準夷自
貽災眚

兩朝赫怒恃彊爲梗厥貫旣盈叩關而請

天戈西指附響躡影或咎其背或繫其頸強虜就俘
伊犁以靖天厭克德益之坎坷旣已衽席轉于水火
能視而眇能履而跛一夫猖狂佐逆是夥武以止戈
風心乃左爰諮爰度在廷震驚羈縻勿絕曰古是程
呼韓事漢漢議定名來服荒忽莫之與爭三驅不戒
惟與並生爲退守謀臆決倡聲

帝曰咈哉維茲統緒惟

天惟

祖既付任予一人罔逸聿求寧處決策用斷亂庶遄
沮爰

命重臣手足心膂厲矛卒事鷹揚鵠舉前途倒戈倡
予和汝游魂就殲綏厥士女準夷既定用釋纍囚曰
和卓木大小二酋或歸其土或撫其僇不我爲德反
以爲讎助逆攻順亭毒虔劉我師再入乃亦首邱首
邱奚罪若不自量爲鬼爲蜮詒我士將徘徊庫車小

人用壯否臧失律深痛鉅創壯哉國士孤軍能抗螫
弧一麾隨魅遠颺桓桓將來茹剛吐柔搜勦餘黨先
彼免投旋師定回曰略曰收曰存曰克惟爾壯猷二
酋餘燼以逸待勞背城借一黑水之濠我軍三千拔
其前茅退而築堡惟我同袍浮寄孤懸偏師深入綆
短汲長羣疑蝟集巍巍

廟算代期及瓜爰秣我馬爰脂我車一鼓作氣蒸雲
蔚霞赫赫將軍深壁固壘龍驤驍騎援兵四起左引

右翼中權屹峙刁斗夜靜旌旗旖旎爰抱枹鼓直搗
賊巢披堅執銳剗犀截蛟彼戰不克載號載呶負創
遠跳逞其咆哮謀臣勇將各奏乃功遮窮徼殲躡跡
追踪二酋奔竄離披解散有林投猿拔達山畔曰求
婚媾諒不我叛彼回匪寇具惟

帝臣負恩反噬痛切神人捧檄用命正及秋旻伐鼓
淵淵

皇帝奏凱綵線將添祥光有耀奉觴介

壽

慈寧樂愷論功行賞恩霑薄海穆穆我

皇謀猷宏遠勲集五年廓增二萬持滿戒溢令德憲
憲以紹以翼孝思繾綣燕及

皇天衍我

烈祖受成于學豐碑三樹業廣德崇超今邁古偃武
修文受

天之祐

平定回部頌

謹序

寶光龔

臣

謹按禹貢雍州之域首紀黑水弱水終以敘
西戎崑崙析支渠搜皆貢方物商頌致美氏羌
來王周西旅貢獒因以爲訓自三代聖王罔不
惠懷廣被垂休簡牒厥後德衰戎狄錯居涇渭
之北秦稍攘卻力界築然西不能過臨洮漢圖
制匈奴始表河曲開玉門通西域三十六國領
以使者都護戊己校尉然耗斲中國單財罷力

僅乃勝之殊乖卽叙之義唐屬國少於漢旋淪
吐蕃宋乃不能盡有中土唯元威制最遠而德
薄弗能迪也我

大清龍興自東撫輯函夏廣幅萬寓惟準噶爾以元
逆臣遺孽嘗世爲明患至噶爾丹益恃覲疆役
使回落數擾鄰蕃窺我北塞我

聖祖

世宗屢用薄伐噤弗得獮

皇帝覆以惠慈羈縻化外人矣比以凶渠再纂毒熬
部人諸台吉內向請命遂乃赫然整旅犁伊犁
之庭繫達瓦齊之頸卒定叛猾斃阿睦爾撒納
於俄羅斯梟和卓木於拔達克山五年之間討
戢勦綏無不如志方都爾伯特等台吉之請師
也

皇帝歷問於廷自大學士忠勇公傅恒外舉以爲難
及我師旣平伊犁阿睦爾撒納覲爲四部大台

吉不獲中途叛逃其黨巴礫克什木阿巴噶斯
哈丹包沁青滾雜卜等相煽爲變我將軍班第
叅贊大臣鄂容安以孤軍五百人力戰致命臺
驛斷梗而同酋大小和卓木者故爲準夷纍囚
我實矜脫之俾長其衆輒亦助逆齟我師賊殺
我使羣狙噉然在列駭聞號號僬僬罔知攸濟

皇帝斷自

天衷以撫以馭萬里之外布指授畫動炳幾先舉事

受成若手符券取償必然蓋我

清受

命造夏

累葉緝熙馨烈煥揚昭登上聞

天將全界所覆內外土宇明章景貺而彼種人稔惡
盈貫于于大刑雖戎首折獲猶假二豎以資掃
除

皇帝秉大生之心行不得已之事神運樞旋靈擢歷

三才圖會卷之三
三
偃關機闔闢先天弗違卒蕩凶穢播以太和遂

荒西極並包曰入推校前古詩書所稱未有比

倫前者伊犁之捷臣方在籍不獲隨廷臣獻納

歌頌今回首授首獻俘班師殷禮具舉而臣適

自浙旋與諸臣趨陪

仗外快覩

大武之成誠自知薄劣文辭不足自效然不勝踴躍

竊於入直之下敬頌

御製告成太學兩碑文勒伊犁格登山葉爾羌伊西
洱庫爾淖兒諸銘及開懋論西師詩篇譬猶觀
海望日心巨震愕輒復不敢措手勉竭愚蒙積
思逾月謹綜平定準噶爾回部兩大功撰頌一
首徵事紀實冀以形容萬一

臣光祿

謹稽首頓

首以獻其辭曰

皇帝作治丕式四極邇矣準戎曰厄魯特元之僕孽
竄于西海隨畜孽蕃如虎而餒眈眈長距擇肉諸回

叶
若火于原燎之方熅熅熅諸蕃不胥以汎有惠策
楞有憬班珠有狡撒納句莅

天誅蒲伏後先厥衆與與

皇帝曰嘻其不可拒顧處若衆我喀爾喀或壯而突
或羣而軋非義之宅其生乃殄^叶寧淬厥鋒俾自爲
戰象筵斯張鏞鏖噶噶

命服雕戈式先啟行嘽嘽我軍八旗索倫北出烏里
西巴里坤伊犁芒芒昂吉宰桑有先于塗有埃于疆

舊逋攸俘克渠旣逃及之格登臨淖而陣廿騎夜叫
十千不守霍集噶力歸以其醜

皇帝建封

詔四衛拉設汗分隸從宜置法彼狡不遂覆煽以逞
賊我二帥有厯其詢

皇帝飭戎其輸矯矯叶旣縻厥子亦敦厥巢彼克伊

窘依阿布賴計脫于齟或毒于蠱起以死捍惠以援
完我師再整彼乃自殘彼殘我奮哈薩旣臣獸之窮

矣走險自隕

叶

蓋達瓦齊踵亂階厲撒納首鼠因以

爲利厥苞二葉庸胥剔之綽羅三族實盡于斯其順

迺存都爾伯特東西布魯亦旣懷德回鶻雜種舊屬

準戎

叶

二酋和卓霍占弟兄係于徽纆我則脫之旣

昇厥土未而堡之撒納中叛敢殄我援我使往諭以

究誕譚孰壅其聽胡血其牙孰殺我刃頓於庫車

皇帝咨惠汝其遄遑阿蘇旣筆烏什旣鞅和闐玉隴

無我拒者旣逼回穴回衆我寡我堡黑水神其我戍

我殫而泉我窘而粟

叶

有銃著木假我以丸我發屢

殫則莫我干我援在途迺先歲出我行旣疾以勞當
逸我後旣踵我馬斯同夜斫回營迺腹背攻回醜旣
譁駭犇呀呀我息更進肆犁厥家納葉爾羌遂有哈
什我師三路並驅繼提伊西爾庫困猶據險靄靄奮
揚礮響飛燄回以孥去厥迺厥風傳檄逐捕聿函厥
首逆首聿函回人爰轅自拔達山暨安集延有隅其
睚有頤其頤象來伊嚙執贄坎坎曾是鱗甲旣帶旣

冠

皇帝有命鑒彼薶頑不順爲戮爲愿則育爾婦爾子
爾田爾牧回人稽首

皇帝萬壽兼冒區域爲大父母叶在昔西人習襲傲
悖嚮利麇合拚離爲賊易贊作制

皇帝之義匡持順貞蠲濯饕戾在昔西人退遂抵觸
骨肉剌夷委填溝瀆救亂忠勤

皇帝之仁遏絕戈刃順于壠畛始議出師盈廷聒膺

告猷滄滄載鬼滿輶不貳不焚

皇帝之明開覺大惑肇耆戎功

叶始

命帥征臨淵憚濟旣其中梗孚號厲億

叶

不震不竦

皇帝之勇否臧勿用以律承

寵方稟

成算軍書郵馳臨軒飛札在寢披帷

總秉神機挈授萬里劉族批肯軒臂使指于坎而津
于巖而衽遂修其榛遂夷其瘼天方曼曼旣圖旣版

掄長釐之匪爲勤遠

二聖之謨

皇帝是繩

二聖之烈

皇帝是承一夫靡獲如茨在躬矧茲蠢蠢弗譴弗龔
天降災祥厥有

成命彼訖而顛我受以正不有狂獍孰資灑掃伊亂
開治欽哉承保

皇帝推

恩蠲租振困卹勤大賚廣厲忠藎

皇帝告成于

廟于

陵于郊勞還式禮兢兢堯切負重武不泄邇於昭令

聞侯其暨爾

皇帝書勲垂

訓乾乾

臣雍

作頌永世是觀

平定回部頌

謹序

吳鴻

臣聞建非常之功者不撓於衆議握萬全之算者獨裕乎沉幾自昔漢論西南唐平淮蔡當時推其斷畧後世侈爲美談而功不越乎尋常事尙需乎叅決若乃宣威於亘古未通之域奏績於羣疑未定之時盛烈邁於前經宏規超於曩代自非

聖謨睿斷符契

天心詎易迅奏膚功紹恢

駿業也乎洪惟我

朝至治救寧中外一統

皇帝纘

列聖之光緒廓六合以爲家日月之所照臨風霆之
所震懾遐陬絕域悉庭悉臣是故

天戈一指而伊犁底平軍檄遙傳而大宛入貢夷考
其地皆自古聲教所弗及而今且列我藩衛隸

我版圖皇哉盛矣逆回大小和卓木者出自幽
繫之餘頓肆滔天之惡背順助逆漸以鴟張

皇帝諮在廷諸臣集議征討顧斯事體大言人人殊
皇帝曰吁維

天助順我

皇朝俾統壹內外輯和而又安之蠢彼小腆而不示
芟夷非所以崇

天道行

天罰爰

命將督師聲罪致討時則衆狙已知悔過元惡迄伏
冥誅而二酋猶煽彼莽蜂逞其狂獗

帝赫斯怒易帥進兵萬里疾馳勇氣百倍遂乃克庫
車城定和雅阿蘇烏什和闐諸部又下葉爾奇
木哈什哈爾二城於是逆酋禿魄鼠伏狼奔同
時授首別部拔達山等詣軍門獻馘并稱臣奉
表以

進大軍奏凱回部悉平是役也藏功祇五載之期
恢疆至二萬里之廣自黃帝以來書策所紀戰
功迴無倫比而運籌制勝悉本

宸衷雖以阻深荒遠陣圖兵法所不及詳而險易悉
昭於

睿算雖以倣詭飛揚五帝三王所不能服而情狀已
炳於

神機用能轉戰無前如拉枯朽迨至治定功成海內

晏如兵革永息而不知

聖主宵旰勤思經營密勿有非在廷言思擬議所及
者故曰

天也夫

天自我

祖宗朝篤祐延庥積百餘載而於

皇上更廓而大之惟

聖憲

天惟

天啟

聖盡

天所覆罔不怙冒此豈尋常徵應之理所可臆測也

歟臣視學南疆久離

禁近伏讀

聖製告成太學之碑開示羣臣之論莊誦尋繹昭若
發矇竊不自揆伏作頌一篇凡十章未能宣揚

聖功之萬一聊自將其愚悃其詞曰

浩浩天山界以龍沙三十六國始通漢家僅羈縻之
曷云臣僕阨塞阻絕縱彼游牧

天厭其亂亦莫其生佑我

大朝以清以寧霜雪蕩滌霆雷震驚始自乙亥掃穴

犁庭一章

嗟爾小腆誕敢肆黠如鴟斯張如猊斯突自外
生成甘作凶孽彼孽已深知不可活誰爲首惡

天威殛之誰爲從逆六師卽之逆散而跳翦其羽翼

帝曰趨之以正厥辟

二章

佇彼崇墉回衆所治賊據其巢以老我師

天監有赫易將弗疑我車我馬載驅載馳組甲雪練
長戈日麾一新號令壁壘旌旗徑度天山行斬月氏
秉我

宸算揚我

天威

三章

桓桓虎臣赳赳禁旅三千一心策入其阻左邀右遮
勢若風雨以寡擊衆堅壁清野

帝有遠謨厲兵秣馬大師之來倍道輕舉賊乃膽落
謂有神助兩軍旣張二城斯撫

四章

相彼狡兔尙或獲之相彼游梟尙或搤之彼回不量
越塞遠匿誰阻

皇威而庇逸賊匪惟畏威兼懷我

德函首軍門奉表

天闕二酋之亡烟消灰滅兩部之定日朗天碧

五章

捷書旣

奏典禮禱宜昭我

大烈告於

皇天百神河嶽升香孔虔

三后鑒茲穆穆明明

慈寧載喜

皇澤載頒萬物欣欣淪浹浹

帝有恩言班勞策勲以示寵惠以勵勞臣

六章

皇帝聖神聰明

天直玉鏡珠囊中天光滿孰爲不靖

皇鑒其隱密勅周防非備之晚孰爲寡謀

皇鑒其短發策決機非制之閫萬象在旁八荒匪遠

天門洞開履道坦坦

七章

皇帝文武智勇

天錫秋肅春溫與

天比則商輅不算民賦不益師不久淹役不再籍彼
喧而呶

天斷必克彼柔而馴

帝命勿棘蕩蕩西陲永奠反側鞭箠不施稟朔奉職
八章

皇帝曰吁惟

天相予予則何有荷

天之衢兢兢業業儆戒無虞愷樂在今祇慎如初凡

百有位職思其居勿侈封禪而廢陳謨勿以洗兵而
忘遠圖

天心永寧

皇心匪紆

九章

蕩蕩

皇圖幬覆宏普函虞育唐登三咸五億兆樂業羣生
和煦師克屢豐庶徵時敘洋溢八表式歌且舞

天佑

皇帝誕受純嘏明堂辟雍文德藻黼日月麗天照耀

萬古十章